

Narrapredigt 2024

1.

Liabe und glickselige Chrischdaheit,
ihr Große und Kloine, halt alls was sich frait.
Herzlich willkomma, i hoff, eich gohts guat.
Es scheint, eich liegt d´Fasnet im Bluat.

D´Gsellschaft entfernt sich immer weiter von Gott,
drum treibt se au zielsicher in ihrn Bankrott.
Wo da heit nagugsch isch Krise agsagt,
alles isch fürchtig vertrackt - - .

Refr: (immer von allen gesungen) Normal isch des fai itt normal, des isch total verkehrt!
Im Gegadoil wärs optimal, wenn jeder sich bekehrt!

2.

Eigentlich isches so gar itt zum Lacha,
denn alls was passiert sind so tragische Sacha,
Viel eher isch mirs zum Bläära zumuet,
des dät da Gsellschaft au guet.

Trotzdem brauchts grad dodafür a Ventil,
doch gefühlsmäßig isches jo arg diffizil.
Drum nütz i dia Fasnet, i sing etz a Liad,
wia uns da Untergang bliahd - - .

Refr: Normal isch des fai itt normal, des isch total verkehrt!
Im Gegadoil wärs optimal, wenn jeder sich bekehrt!

3.

Bildungsmisere in unsere Schuala
au Service-Mangel, koiner losst sich me schuala,
Landärzte-Notstand, des nimmt gar koi End,
Versorgungs-Wüste ausgrechnet im Länd,

Krise bei Leistbarkeit von Energie,
die Inflation macht des Ersparte no hie,
Flüchtlinge kommet in Scharen do her,
s´Klima erholt sich nie mehr - - .

Refr: Normal isch des fai itt normal, des isch total verkehrt!
Im Gegadoil wärs optimal, wenn jeder sich bekehrt!

4.

Da Krisamodus wird zum Dauerproblem
also liegt doch da Fehler im ganza System.
Wie komma mr wieder auf a anders Niveau?
Liegt d' Lösung vielleicht anderswo?

Di rechte Parteia biatat Lösunga a,
und Gott sei Dank kommt a deutlichs Contra
in große Proteste landauf und landab
dia machet noit so schnell schlapp - - .

Refr: Normal isch des fai itt normal, des isch total verkehrt!
 Im Gegadoil wärs optimal, wenn jeder sich bekehrt!

5.

Jetzt endlich simmer am Eigmachta dra,
di Glaubenskrise macht da Eklat!
Wer Gott nimme braucht, der isch selber da King,
der macht halt sai oigenes Ding.

Wie ka aber d'Erde a Kugelform hong,
wenn jeder moint, er müss im Mittelpunkt stong,
wenn jeder moint, s'dreht sich alles um ihn,
koi Wunder isch des Klima dahin - - .

Refr: Normal isch des fai itt normal, des isch total verkehrt!
 Im Gegadoil wärs optimal, wenn jeder sich bekehrt!

6.

Selbst isch da Mensch und vor allem au frei,
so frei in Entscheidunga für allerlei,
ob Mann oder Frau sai, sich selber erfinda,
losst er sich do itt an Bära aufbinde?

Und wenns nimme nahaut sind andere Schuld,
noch ischer a Opfer, hot wenig Geduld,
Verantwortung hot zmol Regierung und Staat
und d'Gsellschaft hot da Salat - - .

Refr: Normal isch des fai itt normal, des isch total verkehrt!
 Im Gegadoil wärs optimal, wenn jeder sich bekehrt!

7.

Überall do, wo ´s heit schwieriger isch,
do schiabt ma Verantwortung über da Disch.
Da Staat soll heut unsere Kinder erzieha,
Lehrer daffet sich mit Chaota abmieha.

Freiheit und Oigaverantwortung leaba,
des hoißt au dia Pflichta itt oifach abgeaba,
Da Staat ka ´s itt leischda, des isch allne klar,
Zivilcourage isch unabdingbar - - .

Refr: Normal isch des fai itt normal, des isch total verkehrt!
Im Gegadoil wärs optimal, wenn jeder sich bekehrt!

8.

Vor fümpfhundert Jahr hot an Bauraaufstand
auf d´Not von de Baura im weita Umland
aufmerksam gmacht und sensibilisiert,
brutal hot ma drauf reagiert.

Vor hundertzwanzg Jahr waret in unsrer Nation
no neunzg Prozent Baura, was für a Proportion,
heit losst ma d´ Hef so langsam wegsterba,
bloß Großbetriebe lont sich vererba - - .

Refr: Normal isch des fai itt normal, des isch total verkehrt!
Im Gegadoil wärs optimal, wenn jeder sich bekehrt!

9.

Power to the Bauer, i finds gar itt schlecht.
sai Arbet soll bezahlt sai, fair und gerecht.
Und zudem will i wissa, was in da Wurscht dinna isch,
I will fai itt bloß no Reis und Fisch.

Warum i jedoch draufkomm: i sieh au für d´Kirch die Gefahr
Gemeindesterberba, Großgemeinde, des isch absehbar.
I mecht mit de Baura saga: Zurück zur Natur,
es bleibt uns halt Verwaltungskram pur - - .

Refr: Normal isch des fai itt normal, des isch total verkehrt!
Im Gegadoil wärs optimal, wenn jeder sich bekehrt!

10.

Wie bei de Baura liegt's in da Kirch an de Leit:
Wie viel isch mr's wert, was sagt mein Steuerbescheid?
Mir hont au dieselbige Gegner derzeit
gega Kuaglocka- und Kirchageläut.

Des wär jo da Aalass für a Koalition
„Bewahrung der Schöpfung mit Schöpfer und Sohn“,
Jesus als Sämann und als Guter Hirt
da Prototyp für da Landwirt - - .

Refr: Normal isch des fai itt normal, des isch total verkehrt!
 Im Gegadoil wärs optimal, wenn jeder sich bekehrt!

11.

Stattdessa zieht sich jeder ins Private zurück
und suacht sein Seelafrieda und sai Glück
im ganz kloina Krois seinra ganz kloina Welt
do simmer überschaubar aufgeschdellt.

Genau des isch jedoch au des Jägers Tod
wenn s' Mitanander zu verkomma droht,
wenn s' Gemeinwohl zu ara Dienstleistung wird
bei uns, wia au bei de Landwirt - - .

Refr: Normal isch des fai itt normal, des isch total verkehrt!
 Im Gegadoil wärs optimal, wenn jeder sich bekehrt!

12.

So, und was nimmsch aus dera Predigt etz mit?
Da Predigt kurzer Sinn: raus aus Misskredit,
mir schaffet in da Kirch und au im Baurastand
an de gleiche Ziele, des liegt auf da Hand:

Lebensqualität und au Nachhaltigkeit
Bewahrung der Schöpfung, globale Einheit,
geabat Gott die Ehre, werdet wie di Friedsamen,
Wie es war so in Ewigkeit. **A: A - men.**

langsamer:

Wie es war so in Ewigkeit. **A: A - men.**